

**1. juli 2019 nallertinnagu inatsisinut nalunaarutit atuutsinneqalernissaannut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Peter Olsen, Inuit Ataqatigiit)

**Akissuteqaat**

(Naalakkersuisut Siulittaasuat)

**1. Siullermeerneqarnera**

Naalakkersuisut aallaqqaasiullugu Inatsisartunut ilaasortaq Peter Olsen, Inuit Ataqatigiit, aalajangiiffigisassatut siunnersuutaanut qutsavigaat.

Inatsisinut nalunaarutininut tunngatillugu apeqqutit 2016-imi 2017-imilu Inatsisartut upernaakkut ataatsimiinneranni § 37 naapertorlugu apeqqutininut marlunnut akissuteqarsimanermut atatillugu Naalakkersuisut akissuteqareernikuupput.

Naalakkersuisut pisuni taakkunani oqaatigisimavaat inatsisit inatsisinut nalunaarutinnngorlugit pisortatigoortumik eqikkarneqartalernissaat Naalakkersuisut tunngaviatigut ajoriffissaqartinnngikkaat.

Taamaakkaluartoq inatsisinut nalunaaruteqalernissaq pisariungaatsiartussaavoq, taamatullu ingerlatsinissaq aallartitsinnagu pisariaqartinneqartut eqqarsaatersuutigineqaaqartariaqarput. Oqaatigineqartutut siusinnerusukku eqqarsaatigineqarsimavoq inatsisinut nalunaarutininik atuutsitsilernissaq. Sulisussanilli amigaateqarneq pissutigalugu suliassaq aallartinneqarsimanngilaq. Tamanna ullumikkut suli unammilligassarivarput.

Siunnersuuteqartup oqaaseqaatai tunngavigalugit ileqqorissaarnissaq eqqarsaatigalugu erseqqissaassutigineqartariaqarpoq inatsisinut nalunaarutit atuuttut inatsimmi aalajangersimasumi allannguutissatut akuerineqarsimasunut tamanut sukkulluunniit attuumassuteqarnissaat ilimananngitsoq.

Sulisussaqaarnikkut inissisimaneq eqqarsaatigalugu inatsimmut nalunaarummik saqqummiussisagaanni nalilersorneqartariaqarpoq inatsisartut inatsisaanut allannguutissatut akuerineqarsimasoq ima pingaaruteqartiginersoq allaat inatsimmut nalunaarummik saqqummiussisoqartariaqarluni. Assersuutigalugu inatsit namminersortunut immikkut pingaarutilik pineqartillugu imaluunniit inatsit pisortanit innuttaasunillu atukulaneqartoq pineqartillugu kiisalu inatsit arlaleriarluni allanngortinneqarsimasoq immikkulluunniit ittumik annertuumik allanngortinneqarsimasoq pineqartillugu.

Allatut oqaatigalugu inatsimmut nalunaarummik saqqummiussineq imminermini qulakkeerinnissinnaanngilaq inatsimmut nalunaarutit atuuttut inatsisini tunngavigineqartuni allannguutinik kingullernik tamatigut imaqaarnissaannik. Soorlu tamanna danskit inatsisaanni amerlasuutigut atuuttartoq.

Peqatigitillugu pingaaruteqarpoq erseqqissaassutigissallugu inatsit ataatsimoortitaq imminermini pituttuisuunngimmat. Tassa assersuutigalugu inatsimmut nalunaarummi kukkunerup ataatsip inatsimmi pineqartumi inatsisitigut inissisimaneq allanngortissanngilaa, tassa inatsit tunngavigineqartoq suli atuutissagami aamma soorlu aalajangersagaasoq Inatsisartut tassaasut susassaqaarfimmi pineqartumi inatsisitigut inissisimaffissamik

aalajangersaasartut. Kisiannili assigiinngiiaartunik nutserineq qanoq paasinninnissamut tunngatillugu assigiinngissutsinik kinguneqartillugu, taamaalilluni innuttaasoq assersuutigalugu inatsisinik eqikkaanermut tatiginnilluni iliuuseqareerluni ajoqutissarsippat aningaasanilluunniit annaasaqarluni pisortat tamatumunnga kukkusumik ilitsersuisimanertulli akisussaatinneqarsinnaapput.

Taamaammat inatsisinik eqikkaaneq annertuunik unammilligassartaqarpoq inatsisinullu nalunaarutit atugaalernerat suliamik ilisimasalinnik sulisussanillu pisariaqartinneqartunik soqarani inatsisitigut isumannaatsuunissamut tunngatillugu ajornartorsiutinik kinguneqarsinnaavoq.

Naalackersuisut nittartagaq inatsisit.gl 2008-mi pilersippaat. Namminersorlutik Oqartussat inatsisaat nittartagatigut tamanut saqqummiunneqartarput, inatsisinut allannguutit piareersarlugit suliarineqarsimani inatsisinullu nalunaarutit ajornanngitsumik aamma pissarsiarineqarsinnaapput.

Tamatuma saniatigut Kalaallit Nunaanni Inatsisinik nalunaarsuiffik Statsministeeriaqarfiup nutarterlugu suliarisimasaa inatsisit.gl-imi aamma pissarsiarineqarsinnaavoq. Nalunaarutini ajornanngitsumik paasiuminartumillu takuneqarsinnaapput inatsisit suut suliassaqarfinnut tiguneqareersunut tiguneqarsimannigitsunullu atuunnersut.

Naalackersuisut inatsisit.gl. aqutigalugu inatsisit, nalunaarutit allallu akuersissutigineqarsimasut ingerlaavartumik tamanut saqqummiuttarpaat. Peqatigitillugu misissorneqarpoq inatsisinik eqikkaanissamut aaqqissuussisoqarsinnaanersoq atuisunut pisariittumik, tassa naalackersuinikkut, aningaasaqarnikkut allaffissornikkullu ingerlatsinermut naapertuutinngitsunik sapinngisamik ikinnerpaanik imalimmik.

Naalackersuisut taamatut oqaaseqarlutik aalajangiiffigisassatut siunnersuut itigartinneqassasoq inassutigaat.